



Za Worklečanskeho wjesnjanostu Franca Bruska (CDU) je nowa hladarnja we Worklecach „Při Krabatowym puću“ dalša zajimawostka, kotaž wjes wuznamjenja. Jěwa-Maria Šnajderowa, jeje mandželski Carsten, kaž tež wšitcy další sobudělačerjo noweho zarjadnišča a jich hosćo, běchu wo programje džeci Worklečanskeje pěstowarnje překwajeni.

Foto: Alfons Handrik

Hladarnja spěšnje připóznata

„Při Krabatowym puću“ we Worklecach maja wosebite přebywaniščo

Worklecy (aha/SN). „Worklecy su wo dalšu zajimawostku bohatše“, wuzběhny minjeny pjatk wjesnjanosta Franc Brusk (CDU) skladnostne dnja wotewrjenych duri dnjoweje hladarnje Carity „Při Krabatowym puću“. Wón nańdže připóznače, zo bu zavrjena předawarnja w běhu jednoho lěta dnjowa hladarnja za staršich ludži, kotrejež flair a wuhotowanje pyta swojeho runječa. Z rjany, lóštnym programom džakowachu so Jě-

wje-Mariji Šnajderowej a jeje mandželskemu Carstenej za jej angažowane dželo wšě džeci Worklečanskeje pěstowarnje.

W nadawku Hornjołužiskeho zwjazka Carity z.t., kotryž je nošer dnjoweje hladarnje z 18 městnami, džakowaše so nawodnica hladanskeje služby Susan Kummer, kotaž je twar přewodžala a runočasne při přewinjenju běrokratiskich zadžekow stajnje k pomocy byla. W běhu

dnja wuži něhdže połsta ludži, wobkedžbujo a dodžeržo předpisy hygiény, wšě rumnosće z cyłkownej ploninu, kotaž wučinja 300 kwadratnych metrow.

Pjatk wužichu skladnosć, hódnoćic zwoprawdženje nastateho, zapósłanc Sakskeho krajneho sejma Alojs Mikławsk a kandidat za nowy zwjazkowy sejm Roland Ermer (wobaj CDU), kaž tež nawoda Domu swj. Jana w Smječkacach Marko Kliman, nawodnica Domu swj. Ludmila w Chrósćicach Mónika Wenclowa a nawoda Marije Marćineho domu w Pančicach Julian Stix.

Najstarša so tam rozhadowaca bě 89lětna Rejza Lawowa. Nic jenož staršim ludžom wotpowědowace zapołożenie sanitarnego trakta abo za wulkomyślnje wuhotowanu kuchnju nańdže słowa připóznača, ale tež terapiowej rumnosći měješe za to, „zo móžeš so tu derje čuć“. Tež 85lětny Pawoł Kindermann so rozhladuju we wulkej přebywarni z dołhim blidom a přijomnymi stólcami móžeše sej tam hižo derje přestajić, zajimawe rozmołwy a wostudu zabywacu bjesadu wjesc.

Jěwa-Maria Šnajderowa bě přemóžena nad wulkim zajimom a nad dobrymi přećemi „zo bychu so tam přebywacy kaž doma čuli“. Wozbožace jej bě, zo staj dwaj samo baseń jako připóznače napisaloj a zo su so hižo někotři rozsudzili, wot 1. julija za dnjowu přebywarnju, wo kotruž budu so štyri wukubłane fachowce starać.



Mnozy starši wobydljerjo z Worklec ale tež wokolnych wsow – najstarša mjez nimi běše 89lětna Rejza Lawowa – wupřachu wšitko dobre.